

Empat rentung nahas di LPT II

■ NOOR HAYATI MAMAT & NURUL ZAILA
MOHD TAHIR

HULU TERENGGANU - Empat orang termasuk dua kanak-kanak rentung apabila kereta yang dinaiki terbakar setelah bertembung dengan sebuah lori dalam nahas di Kilometer 386.6 Lebuhraya Pantai Timur 2 (LPT II), Ajil dekat sini.

Dalam kejadian kira-kira pukul 5 petang itu, dua lagi penumpang kereta yang dipercayai mempunyai hubungan keluarga cedera parah dan dikejarkan ke hospital.

Kesemua mangsa menaiki kereta jenis Kia Spectra dalam perjalanan dari Kampung Tempoyak, Kadok, Ketereh, Kelantan menuju ke Muadzam Shah, Pahang, bagi menghadiri majlis konvokesyen anak di Politeknik Muadzham Shah.

Apabila tiba di tempat kejadian lebih kurang jam 4.30 petang, kereta dinaiki mangsa mengalami kerosakan enjin dan berhenti di lorong kecemasan dari arah Gemuruh, Kuala Terengganu, menghala ke Kuantan.

Ketua Polis Daerah Hulu Terengganu, Deputy Superintendan Hussin Deraman berkata, kejadian berlaku apabila sebuah lori 10 tan tanpa muatan dari Kuala Terengganu menuju ke Johor Bahru dipercayai terbabas lalu merempuh kereta itu.

"Sebelum itu lori tersebut merempuh pengadang jalan di sebelah kiri dan terus meluru ke hadapan sebelah lebih kurang 30 meter di lorong kecemasan sebelum merempuh kereta dinaiki mangsa sehingga terseret sejauh 70 meter.

"Akibat daripada rempuhan dan seretan itu, kedua-dua kenderaan itu terbakar. Kereta terbakar sama sekali, manakala lori



Kereta yang dinaiki enam sekeluarga hangus sama sekali setelah dirempuh lori 10 tan dalam nahas di Kilometer 386.6 Lebuhraya Pantai Timur (LPT II) Ajil-Bukit Besi, petang semalam.

di bahagian hadapan turut disambar api. "Siasatan awal polis mendapati empat mangsa yang rentung terdiri daripada dua dewasa dan dua kanak-kanak. Mereka merupakan penumpang kenderaan itu," katanya ketika ditemui di pekarangan bilik forensik Hospital Hulu Terengganu.

Katanya, pemandu dan kelindan lori telah menjalani ujian saringan awal air kencing dan didapati negatif.

Pemandu ditahan di IPD Hulu Terengganu untuk siasatan lanjut.

Sementara itu, komander operasi dari Balai Bomba dan Penyelamat Kuala Berang, Penolong Penguasa Bomba Mohd Zamri Omar berkata seramai 10 anggota bomba telah dikejarkan ke tempat kejadian bagi mengeluarkan mangsa yang rentung setelah pihaknya menerima panggilan jam 4.39 petang.

INFO

Mangsa yang meninggal dunia:

- 1) Ahmad Razi Harun, 53 - Pemandu kereta
- 2) Dayang Suhana, 23 - Menantu
- 3) Umar Rayyan Suhaimi, 6 - Anak saudara pemandu
- 4) Nur Damia Irdiha Rosailan, 1 - Cucu pemandu

Cedera parah:

- 5) Hafshah Wangai, 56 - Kakak ipar pemandu

Cedera ringan:

- 6) Sharifah Wangai, 49 - Isteri pemandu